



Iesus exemple de toute humilité, laue les pieds à ses Apostres, & notamment à S. Pierre qui en faisoit refus.

UESVS s'estant leué du souper, osta sa robe, prit vn linge & s'en seignit, puis mit de l'eau en vn bassin, & commença à lauer les pieds à ses Disciples, & les essuyer. Il vint donc à Simon Pierre. Et Pierre luy dit, Seigneur, me laues-tu les pieds; Iesus luy dit, Tu ne sçais point maintenant ce que ie fais; mais tu le sçauras cy-apres. Pierre luy dit, Tu ne me laueras iamais les pieds. Iesus luy dit, Si ie ne te laue, tu n'auras point part avec moy. Et Pierre luy dit, Seigneur, non point seulement mes pieds, mais les mains & la teste. Iesus luy dit, Celuy qui est lauë, n'a besoin sinon de lauer les pieds, mais il est tout net. Or vous estes nets, mais non pas tous; car il sçauoit lequel c'estoit qui le trahissoit: Pourtant, dit-il, vous n'estes point nets tous. Apres donc qu'il leur eut lauë les pieds, & repris ses vestemens, il leur dit, Vous m'appellez Maistre & Seigneur, & vous dites bien; car ie le suis. Si donc moy qui suis le Maistre, ay lauë vos pieds, lauez-vous donc ainsi les pieds les vns des autres: car ie vous ay donné exemple, afin qu'ainsi que i'ay fait, vous fassiez aussi. En verité, en verité, ie vous dy, que le seruiteur n'est point plus grand que le Maistre, ne l'Apostre plus grand que celui qui l'a enuoyé; si vous sçavez ces choses, vous estes bien-heureux si vous les faites.